



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Tschernas cumünalas

Als 21 avuost 2011 han lö las tschernas cumünalas pel trienni 2012 fin 2014. D'eleger sun il cussagl cumünal, il cussagl da scoula, la cumischiun sindicatoria e la cumischiun da l'EE. Dal cussagl cumünal as sto retrar Marco Müller pervi da la limitaziun dal temp d'uffizi. Eir per Gianpeder Lechthaler esa d'eleger inchün oter, el ha bandunà Scuol pella fin da gün da quist on. Leta à Porta-Ritz nu candidescha plü, ella es statta 9 ons in cussagl e less far lö a novas forzas. Da la cumischiun sindicatoria sortan Hans Marti e Sybilla Pedrini, dal cussagl da scoula Katrin Tissi e Peder Sem. Da la cumischiun da l'EE ston sortir Walter Bernegger e Matias Filli, eir els pervi da la limitaziun dal temp d'uffizi.

Il cumün ingrazcha a tuot quistas personas per lur ingaschamaint a bön da la generalità.

Halla da parcar du Parc

Il proget per üna halla da parcar suotterrana vain intant sistà, siond cha l'interess davart privats ed hoteliers da cumprar plazzas es massa pitschen. Las plazzas cuostessan perquai daplü co previs oriundamaing. Davo avair spostà ligermaing l'entrada e la sortida da la halla süsom la piazza da parcar dals hotels Gabriel e Conrad s'haja tscherchè l'acconsentimaint da las personas pertoccas directamaing. I nun es stat pussibel da gnir daperüna per quai chi riguarda las cundiziuns.

Stradun

Pervi da la nouva fuormaziun dal Stradun chi spordscha daplü piazza sper la via capita uossa plü suvent chi vain parcà illa zona pels peduns davant il Belvédère, il Coop e la Banca Chantunala. Per cha la pulizia chantunala possa dar multas es gnü relaschè ün scumond da parcar general (parcar be sün plazzas signalisadas, fermativas cuortas sun pussiblas eir dadour quellas) tanter l'areal da la posta e'l Center Augustin, intant per 60 dis, siond cha quai es pussibel sainza publicaziun uffiziala. Il cussagl ha uossa decis da relaschar ün scumond chi vala fin cha'l nouv concept da parcar per tuot il cumün es in vigur, maximalmaing fin la fin dal 2012. Quist intent vain publichà prosmamaing.

Senda da Plai

Il proprietari da cuniglts ed otras bes-chas pitschnas tanter la senda dal Pader e la senda da Plai ha serrà minchatant il passagi pervi da vandalissem e disturbis per part cun consequenzas mortalas pels cuniglts. Daspö ons daja perquai gronds disgusts ed intschertezzas davart il passagi public sur quista parcella privata. Il cussagl ha decis da metter a disposiziun al proprietari ün oter lö, e quai sün parcella 1659 (Munt Baselgia, suot la garascha), quai per üna dürada limitada. Il cumün pissera eir pel suost necessari, incl. il proceder pel permiss da fabrica, e survain percenter la parcella culla senda da Plai.

Cronica da Scuol

La lavur da l'istoriker Paul Grimm va vers la fin. Davo avair trat aint differentas offertas ha decis il cussagl cha'l cudesch vain stampà da la firma Gammeter da San Murezzan al principi da l'on chi vain. Las lavuors correspondentas pon gnir fattas per part a Scuol ingio cha la firma ha eir ün büro, per part a San Murezzan. Il cudesch cumpara d'utuon dal 2012.

Biblioteca populara

La biblioteca populara gniva organisada fin qua sün basa privata, cun contribuziuns finanzialas davart dal cumün. Il cussagl ha decis cha'l cumün dvainta portader resp. as partecipescha vi d'ün'organisaziun portadra sco chi'd es gnü giavüschè da las bibliotecaras. Al listess mumaint vain adattà il büdschet, e las contribuziuns cumünalas s'augmantan da 42'000 sün 60'000 francs l'on, tanter oter per cha las pajas fich bassas da las collavuraturas possan gnir dozadas. Il cumün surpiglia plünavant ils cuosts pella nouva signalisaziun (signalisaziun unitara pellas bibliotecas in tuot il Chantun).

Funtana da Rablönch

Il cumün ha pudü cumprar üna surfatscha da s-chars 693 m² pro la funtana cun aua minerala in Rablönch. Sco prossem pass esa previs da far l'inchaschamaint da la funtana (chi'd es inchaschada pel mumaint be provisoricamaing) ed eventualmaing da metter nan ün bügl.

Tablas da bivgnaint

Las tablas da bivgnaint sülla via d'Engiadina, a la periferia dal cumün, sun uossa prontas, davo chi d'eira gnü sistà il permiss davart dal Chantun e la Confederaziun. Las directivas da la pulizia chantunala nu permettän ingünas culurs, dimpersè be il tun brünaint sco pro las tablas turisticas in oters lös, fotografias vegnan però acceptadas. Il cussagl ha dat a la direcziun l'incumbenza d'instradar ils prossems pass.

Giubileum bikemaron

Il bikemaron intuorn il parc naziunal ha lö quist on per la 10avla jada. Sonda saira als 27 avuost ha lö üna festa da giubileum in Trü. Per evitar canera dals autos esa gnü dumandà da serrar la via da Trü dürant quella not. Il cussagl ha refüsà quista dumonda per motivs pratics, dà però incumbenza a la pulizia da far controllas plü intensivass.

Via da Pradella

Il rom d'ün proget NASAK (Nationales Sportanlagen-Konzept) pudess gnir sustgnüda l'asfaltaziun da la(s) via(s) intuorn Pradella. L'Institut otalpin da Ftan ha elavurà ün concept correspondent per cha'ls passlungnists da la classa da sport vessan ün traiget tant inavant planiv per trenar d'instà (skis cun rollas). Ün tal traiget serviss però eir als indigens e giasts chi van cun inline-skates, a famiglias cun charrozzas, uffants pitschens cun velos etc. Il cussagl salüda perquai quist intent, intant almain per üna prüm'etappa (Chaschlans - Pradella - Punt da la loipa - sarinera - Duasasa). Ils cuosts nu füssan fich gronds, e vias catramadas dan damain lavur pel mantegnimaint. Pella finanziaziun vegnan in dumonda eventualmaing sper la NASAK eir otras funtanas, p.ex. il sport-toto.

Planisaziun

Il güdisch administrativ chantunal ha dat radschun al cumün e refüsà ils intents d'ün proprietari da terrain chi laiva sforzar al cumün da metter sia parcella in üna zona da fabrica.

Plan da quartier Corgnuns/Tof

Cunter il plan da quartier surnomnà d'eiran entrats divers recuors chi's drizzan cunter l'otezza, lunghezza e la fuormaziun dals stabilimaints, plünavant cunter piazzas da parcar ed oter plü. Il cussagl ha decis da refüsar quists recuors cun ün'excepziun. Ils recurrents han uossa amo la pussibilità da recuorrer pro'l tribunal administrativ chantunal. Scha quai nu capita aintra il plan da quartier in vigur.

Surdattas da lavuors

Surfabricaziun Schinnas, part cumünala dal provedimaint d'aua:

- Lavuors d'indschegner: Caprez Indschegners SA, Scuol
- Lavuors d'impessari: Bezzola Denoth SA, Scuol
- Installaziuns sanitaris: Guido Christoffel, Scuol

Sarinera da S-charl

- Installaziuns electricas: Electra Buin SA, Scuol

Dumondas da fabrica

Il cussagl resp. la direcziun han dat ils seguaints permiss da fabrica:

- Martin Keller: permiss provisoric per ün container sco ricover in cas da trid'ora pel bescher aint in S-charl (coordinatas 824'344 / 176'910)
- Judith + Gian Dorta: müdamaints interns e nouva terrassa, Chasa Alpina, S-charl (Prada Sura, parcella 6036)

sco eir per progets plü pitschens (müdamaints interns, renovaziuns da fanestras e reclomas).